
Na osnovu člana 14. Zakona o sistemu indirektnog oporezivanja u Bosni i Hercegovini ("Službeni glasnik BiH", br. 44/03, 52/04, 34/07, 4/08, 49/09, 32/13 i 91/17) i člana 21a. stav (2), 21b. stav (5) i 21d. stav (2) Zakona o akcizama u Bosni i Hercegovini ("Službeni glasnik BiH", br. 49/09, 49/14, 60/14 i 91/17), Upravni odbor Uprave za indirektno oporezivanje, na 31. sjednici održanoj dana 11.10.2018. godine, donio je

**ODLUKU
O UTVRĐIVANJU SPECIFIČNE I MINIMALNE
AKCIZE NA CIGARETE I IZNOS AKCIZE NA DUHAN
ZA PUŠENJE ZA 2019. GODINU**

Član 1.

Ovom odlukom utvrđuju se iznosi specifične i minimalne akcize na cigarete i iznos akcize na duhan za pušenje, koji se primjenjuju od 1. januara 2019. godine.

Član 2.

- (1) Od 1. januara 2019. godine, na cigarete se plaća akciza, i to:
 - a) proporcionalna akciza, po stopi od 42% na osnovicu utvrđenu u skladu sa članom 15. stav (1) tačka b) Zakona o akcizama u Bosni i Hercegovini ("Službeni glasnik BiH" br. 49/09, 49/14, 60/14 i 91/17, u daljnjem tekstu: Zakon) i
 - b) specifična akciza u iznosu od 82,50 KM za 1.000 komada, odnosno 1,65 KM za pakiranje cigareta od 20 komada.
- (2) Za pakiranja različita od pakiranja navedena u stavu (1) tačka b) ovog člana specifična akciza se plaća srazmjerno broju komada u pakiranju.

Član 3.

- (1) U skladu sa članom 21b. stav (4) Zakona, prema evidenciji o izdanim akciznim markicama Uprave za indirektno oporezivanje, prosječno ponderirana maloprodajna cijena cigareta u periodu od 1. jula 2017. godine do 30. juna 2018. godine, iznosi 4,76 KM za pakiranje cigareta od 20 komada.
- (2) Minimalna akciza na cigarete se izračunava u visini od 60% na prosječnu ponderiranu maloprodajnu cijenu cigareta iz stava (1) ovog člana.
- (3) Primjenjujući metodologiju iz stava (2) ovog člana utvrđuje se minimalna akciza u iznosu od 143,00 KM za 1.000 komada, odnosno 2,86 KM za pakiranje cigareta od 20 komada.
- (4) Za pakiranja različita od pakiranja cigareta od 20 komada, minimalna akciza se plaća srazmjerno broju komada u pakiranju.
- (5) Minimalna akciza utvrđena u stavu (3) ovog člana primjenjuje se od 1. januara 2019. godine.
- (6) Ukoliko je ukupna akciza na cigarete koja je obračunata u skladu sa članom 2. stav (1) ove odluke, manja od minimalne akcize iz stava (3) ovog člana, plaća se minimalna akciza iz stava (3) ovog člana.

Član 4.

- (1) Akciza za duhan za pušenje utvrđuje se u visini od 80% minimalne akcize utvrđene u članu 3. stav (3) ove odluke i iznosi 114,40 KM po kilogramu.
- (2) Akciza za duhan za pušenje utvrđena u stavu (1) ovog člana primjenjuje se od 1. januara 2019. godine.

Član 5.

- (1) Porezni obveznici i druga lica koja se bave prometom cigareta dužni su popisati zalihe cigareta na dan 1. januar 2019. godine obilježene akciznim markicama izdanim od 1. januara 2010. godine do 31. decembra 2018. godine i popisne liste dostaviti nadležnom regionalnom centru Uprave za indirektno oporezivanje (u daljnjem tekstu: Uprava) do 7. januara 2019. godine.
- (2) Porezni obveznici i druga lica koja se bave prometom duhana za pušenje dužni su popisati zalihe duhana za pušenje na dan 1. januar 2019. godine, obilježene akciznim markicama izdanim od 1. januara 2010. godine do 31. decembra 2018. godine i popisne liste dostaviti nadležnom regionalnom centru Uprave do 7. januara 2019. godine.
- (3) Porezni obveznici koji se bave prometom cigareta i/ili duhana za pušenje dužni su popisati količine akciznih markica za cigarete i duhan za pušenje preuzete do 31. decembra 2018. godine, a koje nisu iskorištene za obilježavanje cigareta i duhana za pušenje do 31. decembra 2018. godine i popisne liste dostaviti nadležnom regionalnom centru Uprave do 7. januara 2019. godine.
- (4) Popisne liste iz stava (1) i (3) ovog člana treba da, pored naziva obveznika ili drugog lica koje se bavi prometom cigareta i ID broja, sadrže sve elemente utvrđene članom 67. stav (1) tačka a) Pravilnika o primjeni Zakona o akcizama u Bosni i Hercegovini ("Službeni glasnik BiH", br. 50/09, 80/11, 48/12, 74/14, 85/17 i 4/18, u daljnjem tekstu: Pravilnik).
- (5) Popisne liste iz stava (2) i (3) ovog člana treba da, pored naziva obveznika ili drugog lica koje se bavi prometom duhana za pušenje i ID broja, sadrže sve elemente utvrđene članom 67. stav (1) tačka c) Pravilnika.

Član 6.

- (1) Porezni obveznici i druga lica koja se bave prometom duhanskih preradevina dužni su na zatečene zalihe cigareta i duhana za pušenje utvrđene u popisnim listama iz člana 5. stav (1), (2) i (3) ove odluke obračunati akcizu shodno članu 2. stav (1) i članu 3. i 4. ove odluke, te do 17. januara 2019. godine uplatiti razliku između obračunate i već uplaćene akcize, na Jedinствени račun.
- (2) Porezni obveznici koji uvoze duhanske preradevine nakon 1. januara 2019. godine, a za koje su akcizne markice preuzete u periodu do 31. decembra 2018. godine ne plaćaju razliku akcize pri uvozu, pod uvjetom da nadležnom carinskom organu prilikom carinjenja koje se vrši prilože kopiju, Upravi dostavljene, Popisne liste zaliha neiskorištenih markica na dan 1. januar 2019. godine, a poslije 17. januara 2019. godine i kopiju izvršene uplate razlike akcize iskazane u navedenoj popisnoj listi.
- (3) Kalkulaciju maloprodajne cijene, formiranu shodno ovoj odluci, porezni obveznici dužni su dostaviti nadležnom regionalnom centru Uprave do 30. novembra 2018. godine.
- (4) Duhanske preradevine za koje je plaćena razlika akcize shodno stavu (1) ovoga člana, prodati će se po novim maloprodajnim cijenama, koje moraju biti istaknute na vidnom mjestu maloprodajnog objekta.

Član 7.

- (1) Ova odluka stupa na snagu osmoga dana od dana objave u "Službenom glasniku BiH", a primjenjuje se od 1. januara 2019. godine.
- (2) Danom početka primjene ove odluke, prestaje da važi Odluka o utvrđivanju posebne i minimalne akcize na cigarete i iznos akcize na duhan za pušenje za 2018. godinu ("Službeni glasnik BiH", broj 84/17).

Predsjedavajući
Upravnog odbora
Vjekoslav Bevanda, s. r.

Broj 02-02-89-2/18
11. oktobra 2018. godine